

24

1613

3196

311

ADVIS AVX
GENS DE BIEN.

8

M. DCXV.

ADVIS VV

CHURCH OF ST. MARY

1844



A D V I S A V X

GENS DE BIEN.



E v x qui ont dit que la mescognoissance n'estoit vne seule meschanceté, mais toute meschanceté, se sont mespris: La proximité, qui est de la conception à la parole, les a abusez: Ils ont prins sans doute la mescognoissance au lieu de la mesdisance: Car pour exprimer la nature de toute execration, l'execration mesme, le Démon infernal, les Theologiens n'ont peu trouver vn mot plus convenable que celui de calomniateur. Les Doctes aussi nous representent ce crime par les choses les plus horribles de toutes, le fer, le feu, le sort, la rage, & la morsure des Serpents. C'est vn trenchant, disent-ils, qui entame & met en pieces les choses les plus compactes; vn feu qui surprend les

plus aduisez au plus profond de leur repos, & les embrase premier que d'estre éucillez, aux ressentiments de cet accident funeste: vn sort qui corrompt l'air le plus pur, abat & destruit les natures les plus vigoureuses, & change l'estat de santé le plus entier : vne rage non d'un chien vulgaire, mais d'un Cerbere infernal, dont la baue produit l'aconit, le poison le plus present & le plus mortel du genre humain: En fin vne morsure serpentine, mais non des serpents communs, ains d'un aspic, dont la pointure insensible a plustost pourry tout le corps qu'on se soit apperceu de la picqueure.

Ce venin couué & fomenté dans les ordures d'un esprit bas & fangeux s'écloft en deux sortes de monstres. Le premier éclate tout hault, tout ouuertement, & à toute outrance : Le second ne parle qu'à demy, en l'oreille, & à cachette : Le premier plus il fait veoir de rancune & d'animosité, moins il fait recognoistre de verité: Le second, plus il se pare d'amitié, de respect, ou de crainte, plus il persuade. Au premier, plus on en dit, moins on en croit: Au second, moins on en fait appercevoir, plus on en fait concevoir. Le premier s'attache

à toutes sortes de personnes, iusques au plus basses: Le second n'attaque principalement que les Grands & les Princes. Le premier partant est le moins redoutable: le second est non seulement calamiteux, mais tres-calamiteux; & dauantage, s'il se peut trouuer quelque chose au dessus de la suprême calamité.

Tout ainsi que tout le monde, quoy que non offensé, accourt contre vn serpent aussi tost qu'il se monstre, pour l'exterminer par toutes sortes d'armes, & les premieres qui viennent à la main; de mesme il faut qu'un chacun coure sus à toute reste à ceste espee de monstre, pour l'estouffer aussi tost qu'on le void poindre, pour l'horreur & la haine seule de la nature de son venin: & ce de tant plus lors qu'on void qu'il se respand sur les parties les plus nobles.

Mais dira quelqu'un, la vengeance ne possede qu'un esprit lasche, elle ne touche que les courages impuissants, les paroles ne blessent pas quand on les mesprise: elles n'offencent que lors qu'on s'en offense: Si on s'y veut arrester, on rencontrera tousiours l'Eptaphone de la ville d'Olympie; ou si vous voulez, l'Echo de Charan-

zon, qui pour vn mot vous en redira sept & d'auantage: Celuy a assez la vengeance qui l'a quand il luy plaist: Les plantes Royales, le Cumin & le Basilic croissent plus verdoyantes par les mauuaises & execrables paroles. Auguste (la gloire des grands Empereurs) s'est esleué par la clemence au dessus de la nature mortelle, pour monter aux sieges des Dieux. Le vilain Neron au contraire s'est rendu par la vengeance la honte & l'opprobre des Princes, & en fin l'ordure & l'abomination du genre humain.

Il est vray, la calomnie est vn grand mal, qui ne s'appaise de paroles, il veut de plus puissants remedes. Le Cumin & le Basilic croissent bien tost, mais ils ne s'esleuent pas beaucoup hault, & ne durent guieres: les Grands ne peuuent estre atteints que par ceste poison. Achille n'estoit vulnérable que par vn endroit fort petit: Les Princes ne le sont que par cestuy-cy seul. Les Lions, dont la fierté genereuse espouuante les animaux qui donnent le plus de terreur, tremblent & se faschent de la voix offensive d'vn petit coq. Il est vray, Auguste doit estre le patron des bons Princes, & Neron leur horreur: Mais en se moulant

sur Auguste, ils verront que comme le progrès & la fin de son Empire n'ont esté que douceur & benignité, que les commencemens en ont esté fort seueres : Il teignit pour s'établir (dit Seneque) toute la mer Acciatique du sang des Romains, & bannit vne bonne partie du reste. Au contraire, en detestant Neron, ils recognoistront que comme il finit son regne par toutes especes de cruauté, qu'il le commença par toutes sortes de clemence & de douceurs si extrêmes, qu'estant contraint en ce temps de signer la mort de deux hommes, quoy que tres-scelerats, il se repentit (tant il estoit doucet alors) d'auoir appris à escrire. D'autant que toutes sortes de vertus sont desirées en vn grand Prince, la seuerité estant du nombre, elle s'y doit trouver en son temps & en son rang : Le regne d'un Prince a ses saisons aussi bien que l'année ; de sorte que comme l'année ne se peut passer sans tonnerre, aussi ne se peut vn regne sans quelque seuerité : Mais comme les tonnerres du Printemps sont de bon augure, parce qu'ils presagent que le reste de l'année sera tranquille ; aussi le cours d'un regne est plus assésuré quand les commencemens sont vn peu fermes & roides.

Il semblera possible que ce Discours vueille donner quelque soupçon de la grande douceur pratiquée pendant la minorité du Roy : Non, la regence de la Roine n'a peu estre trop indulgente ; les remedes genereux ne se doiuent pratiquer que par l'ordonnance expresse du Medecin seul, ny appliquer que par les mains des Maistres: On ne doit vsfer attendant la venue du Medecin, que de remedes paliatifs. C'est au Roy seul au commencement de sa majorité à estre moins doux: Les fruits qui en leurs commencemens ont vn peu d'aigreur, sont les plus doux en leur maturité.

Or si le Roy doit en ces commencemens faire paroistre quelque seuerité, il me semble que ce doit estre contre les calomniateurs. Les morsures veneneuses veulent le feu & le fer tout au commencement: si on s'y prend plus tard, le mal se rend incurable, & ne fait on plus lors que bourreler le corps, sans le pouuoir iamais sauuer: De mesme si vn Prince laisse prendre racine au venin de la calomnie, & se couler iusques dans le cœur de ses peuples, le mal est lors par-dessus le remede: De sorte que s'il le pense faire appliquer en ce

temps, il perdra le nom de Roy pour s'acquiescer celuy de Tyran. Les vertus ne se treuvent iamais dans l'excès. Si la Clemence donnoit iusques à l'extremité, elle degenereroit de sa nature, pour se conuertir en stupidité ou lascheté de cœur. La vraye Religion reuerse Dieu, mais la superstition l'offence: La Clemence bien reglee aussi honore les Princes, mais si elle deuiant démesurée, elle les rend contemptibles.

Ceste peste negligee en sa naissance, rendit premierement le Roy Henry III. mesprisable: puis poussant la haine dans l'ame de ses subjects, mit en fin la rage dans le cœur d'un abominable Moine, & le parricide fer en sa main, pour en assassinant ce bon Roy, mettre toute la France au feu, au sang, & au pillage; & rendre ceste Roine des Prouinces, l'Esclau des nations estrangeres: Ce bel œil de la terre, la partie la plus difforme de ce grand corps de l'univers. C'est elle-mesme qui fit en fin que nostre grand Henry, l'amour de ses peuples, & la terreur des armées; cet admirable Guerrier, qui auoit passé le cours continuel de quelques trente années au trauers le peril des armes de plus de deux

cent mille soldats, en cent quarante combats; celuy que la fureur mesme des canons n'auoit peu effencer en trente-cinq rencontres d'armees; trois batailles rangees, & plus de trois cents sieges de villes, fut en vn moment estaint, par vn traistre, piqué & eslançé de ceste rage, lors qu'on le pensoit estre en vne pleine assurance.

Les sots Phrygiens deuiennent (quoy que bien tard) sages toutesfois à la parfin. Ferons-nous tousiours veoir que les François ne le peuuent iamais estre? Tous ceux qui sont auourd'huy en aage de iugement, ont veu les feux des guerres ciuiles dernieres, & recognu que la calomnie seule les auoit alumez: Ils auoient tous protesté qu'ils ne se lairroient plus coiffer de pareilles biffes; neantmoins on fait iouer auourd'huy tous les mesmes artifices, sans qu'ils les recognoissent: Est-ce qu'ils ne s'en ressouuiennent plus, & que ce venin insensible leur aye desia stupefié le sens & la memoire?

Ils ont veu que lors que la France estoit toute florissante & en son plus grand lustre, on commença à se plaindre que tout estoit en desordre, que la confusion estoit en tous les Estats; qu'vn chacun ne

faisoit que soupirer le malheur de son siècle: neantmoins que toute leur plus grande plainte estoit le luxe du temps, & qu'en ce faisant on ne se plaignoit que de trop d'aise, & d'un trop bon ordre en l'Estat; veu que le luxe ne naist que d'un excès de felicité, ceste felicité d'une bonne santé, en l'estat y acquise, & conseruee par la continuation d'un bon & parfait gouuernement. Ne se peuent-ils plus resouuenir que ceste espece de suprême calomnie commença à faire ses approches de bien loing & tout à couuert; se plaignant premierement d'une mauuaise conduite en tout le general des ordres? Puis incontinant apres, ceste gangrene cheminant plus auant, pour n'auoir esté arrestee en son commencement, qu'elle se print aux Ministres de l'Estat, & aux plus fidelles & asseurez seruiteurs de sa Majesté, accusant les vns de ne seruir qu'à donner de pernicious aduis, & les autres à tirer des mains du Roy la gresse du peuple? En fin que ceste virulence s'attacha iusques aux deportemens les plus particuliers du Roy, le representant à ses subjects plus hideux & difforme en ses mœurs, que les Peintres ne font les malins Démons au peuple: D'où

s'ensuiuit tout aussi tost la haine , le mespris, la reuolte , & la mort pitoyable de ce grand Prince.

Lors que la France aussi apres la cheute de son grand Henry, apres la perte de tout son appuy, se fut (cōtre l'esperance de toute la preuoyance humaine, contre le cours de toutes minoritez Royales , & partant par vne conduite qu'on ne pourra iamais assez reuerer) maintenüe au plus hault point de sa felicité , & en vn doux & heureux repos , on commença à se plaindre que la confusion estoit en tous les ordres, chose facile à persuader au peuple , veu que l'abus en tous les Estats n'est d'auourd'huy, mais depuis que les hommes sont hommes, chacun s'est tousiours plainct de son siecle, de sa condition, & de son aage: Il n'y a chose quelle qu'elle soit, qui n'aye beaucoup de defauts: Dieu seul est bon absolument; chaque chose ne peut pas estre toutes: La perfection de l'vniuers ne consiste qu'en l'ordre, & l'ordre en la diuersité & inegalité. Il est non seulement vray qu'il n'y a personne qui soit sans vice, mais possible sans crime. Si l'offence qui est commise contre les biens ou l'honneur d'autruy est souuent pareille à celle qui est

faicte contre la vie, qui est celuy qui ne soit au-moins vne fois en sa vie trébuché en quelqu'une de ces trois, & partant qui ne soit criminel? Si tous les crimes estoient punis, les grands chemins ne seroient assez spacieux pour y planter des gibets: Il n'est donc pas expedient que tous les criminels soient chastiez, mais que le chastiment tombe sur quelques-vns, pour donner terreur aux autres, non que ceux qui reçoivent la punition ne l'ayent meritee, mais parce que d'autres qui sont autant ou peut-estre plus coupables en demeurent exempts.

Voyons maintenant ceste medaille par le reuers; Comme peu de gens se trouuent qui soient sans crime, aussi peu de personnes se trouueront sans quelque merite. Personne ne s'estime malhabille homme, vn chacun a bonne opinion de soy-mesme. Comme la punition est deuë au crime, le merite demande la recompence: Mais comme il n'est pas expedient que tout crime soit puny, aussi est-il impossible que tout merite soit bien reconnu. Comme il n'y a personne qui puisse si bien ressentir la qualité de l'offence que celuy contre qui

elle est faicte, auffi n'y a il personne qui puisse mieux iuger ny recognoistre le merite que celuy duquel on a bien merit . Les biens sont deubs aux Roys par leurs subjects en beaucoup de petites parcelles, parce qu'ils prouiennent de petites gens: Ces biens par-aptes sont deubs aux seruiteurs des Roys en plus grosses parties, parce qu'ils prouiennent des Roys & de personnes routes magnifiques: De sorte que puis qu'il est necessaire de donner en gros ce qu'on a receu en d tail, on ne peut donner   tous l'une des natures qui repugne   l'autre: ce qui est impliquer la contradiction, que Dieu mesme ne peut ou plustost ne doibt exercer. Vous direz par-aduventure, au-moins doiuent-ils donner   ceux que tout le monde recognoist meriter le plus, & non souuent   ceux qui sont estimez d'un chacun estre sans merites.

S achez que ceux qu'on pense le plus souuent meriter beaucoup, sont ceux ordinairement qui meritent fort peu ou point du tout. L'opinion du peuple est tousiours sotte; il faut seulement parler comme le peuple, & non-pas iuger comme le peuple: Il n'y a que le Maistre seul qui puisse bien iuger du merite de ses serui-

teurs : De sorte que celuy qui est le mieux reconnu , doit estre estimé celuy qui a le mieux seruy , souuent par vne consideration particuliere & cognüe au Maistre seul. Je diray encôres plus ; les hommes égaux en merites aupres des Roys , sont comme gettons d'une mesme valeur en leurs mains. Quand il faut getter mille , celuy qui se trouue le plus pres des doigts est posé sur le comptoir pour ceste somme. Puis-que les Roys doiuent estre magnifiques , quand il faut qu'ils donnent , ceux qui se sont logez le plus pres de leurs cœurs , doiuent estre employez dans l'estat de leur magnificence , & non les autres. L'ordre du geſt du monde & de tous estats bien policez le requiert ainsi : Dieu mesme ne dispense point autrement ses graces : C'est pourquoy les Princes , qui sont des Dieux visibles , ne doiuent ny ne peuuent proceder autrement.

Le plus doux souſpir en l'homme est celuy de la plainte : le plus visible leurre pour le reclamer est celuy-là mesme : Il se plaist naturellement en la plainte , parce qu'entre tous les animaux il est le plus desirieux d'honneur & de loüange : En le plaignant , ou se plaignant , on le louë , ou il se

louë: Car se plaindre, ou estre plaint, c'est dire ou ouïr dire qu'on n'a pas le bien qu'on merite: Il se plaint, dy-ie, parce qu'il est le plus outrecuidé, & par consequent le plus ingrat de tous les animaux. Comment ne se plaindroit-il de son Prince, puis qu'il se plaint de Dieu mesme? Car ceste creature, faicte premierement de bouë, que son Createur neantmoins a mis au milieu de toutes les beatitudes pour participer à toutes: qu'il a fait intellectuëlle, pour participer à la felicité des substances puremēt intellectuëllles: & corporele, pour se ressentir de celle des natures corporelles, ne laisse pour cela d'iniurier ceste toute Bonté, & de l'appeller marastre en son endroit: se plaignant de ce qu'elle la met au mōde seule entre tous les animaux, toute nuë, sans armes, & sans industrie aucune; qu'elle luy donne vne vie plus courte que celle qu'elle a donnee aux corbeaux, aux cerfs & aux chesnes mesmes; & ceste vie encore subiecte à plus de maladies que n'est celle de tout le reste des animaux tous ensemble. En fin si Dieu la vouloit ouïr en ses plaintes, elle lui porteroit des cayers qui en contiendroient dauantage que ceux que Messieurs des Estats ont présenté au

Roy; qui ont esté de telle consideration & si immenses, que la premiere Prouince, la mieux pollicee, celle qui reçoit le plus de graces de son Roy; en vn mot, qui a le moins d'occasion de se plaindre, a esté celle qui en a donné le plus.

On faict plaindre le peuple à cause de la venalité des offices, pour ne luy donner à cognoistre qu'il y a certains defaux en la fragile conduite des hommes, qui ne peuvent recevoir de remede, & desquelles pour ceste raison on s'est plaint, & se plaindra on tousiours; tel qu'est cestuy cy: Car en quelque temps que ce soit, les charges publiques sont tousiours tombees sous le commerce directement ou indirectement: Parce que en fait de delict, les voyes cachees sont detestables, puis qu'on ne peut retirer les hommes de ce trafic, la premiere voye doit estre toleree, pour oster l'occasion de se porter à la derniere. S'il est permis par vn droit commun à toutes les nations de vendre ce qu'on a achepté, on ne peut par le mesme droit vendre autrement qu'à decours ce qu'on a achepté de ceste sorte: en quoy il n'y peut auoir abus ny tromperie. Pendant l'Estat populaire des Romains, ceux qui desiroient estre

promeuz aux offices , les briguoiẽt par
 toutes sortes de moyens, dont on se peut
 seruir pour corrompre la libertẽ des suffra-
 ges d'vne Commune , iusques à les achep-
 ter en fin si publiquement & à beaux de-
 niers comptans, qu'on vint à s'aider pour
 cet effect comme de trois sortes d'Offi-
 ciers: les premiers appelez *Interpretes* , qui
 estoient ceux qui faisoient l'abouchement
 & le marchẽ avec le peuple: Les seconds
Sequestres , par deuers lesquels on confi-
 gnoit les deniers dont on auoit conuenu:
 Et les derniers *Diuisores* , qui les parta-
 geoient & distribuoient. L'Estat du depuis
 estant tombẽ sous la puissãce d'un seul,
 les Empereurs pensant empescher telle
 venalite, la rendirent plus pernicieuse: Car
 comme ils refuserent de prendre argent
 des officiers, on eut recours aux Courti-
 sans , & à ceux qui auoient plus de faueur
 en Cour: ce qui tomba en tel desordre, qu'à
 la fin les fauoris des Empereurs vendirent
 tout ouuertement leur faueur & recom-
 mandation: A quoy les Empereurs n'ayant
 peu remedier, & considerant le grand pro-
 fit qui leur en pourroit venir, ils y prin-
 drent part eux-mesmes: De sorte qu'il y
 eust en l'Empire Romain deux façons d'a-

chepter les offices: La premiere des Courtisans, qui s'appelloit *Privatum suffragium*: & l'autre des Empereurs mesmes, appellee *Dominicum suffragium*. Quant aux mesmes offices qui estoient restez en l'election du peuple, ceux qui vouloient y paruenir s'obligeoient auparauant qu'en estre pourueuz, de faire quelque dons au public, ou representer quelques ieux & spectacles au peuple, ou bien d'employer quelque somme d'argent aux affaires de la chose publique: lesquelles promesses appellees en droit *pollicitations*, estoient approuuees & tenuës pour obligatoires. En nostre France, auant qu'ils fussent perpetuels, ils estoient si publiquement venaux, qu'on les bailloit à ferme au plus offrant & dernier encherisseur: Ce qui a esté practiqué mesme par saint Louys, pour les petits Bailliages subalternes, & ressortissans au grand Bailliage ou Seneschauſſee de la prouince. Depuis qu'ils ont esté faits perpetuels, Louys XII. surnommé Pere du peuple, & que nous reclamons tant aujourdhuy, rendit le premier les offices perpetuels venaux, à l'imitation des sages Venitiens, lesquels ayant despensé plus de cinq millions de ducats à la guerre qu'ils

auoient contre luy, s'aduiferent pour remplir leur thresor tout espuisé, de vendre les offices de leur Republique: Par laquelle venalité la conscience ne peut estre interessée, attendu que saint Thomas consulté sur ceste difficulté par vne Comtesse de Braban, a laissé par escrit en ses opuscles, que ceste venalité est licite.

De quelque façon qu'on obtienne vn office, par don ou par achapt, on n'y parvient point qu'apres l'information des vies & mœurs, & l'examen de la suffisance: De sorte qu'entre personnes égales en sçauoir & probité, le riche sans doute doit estre preferé au pauvre, d'autant que le riche est moins aisé à corrompre que le pauvre: Les plus fermes flechissent naturellement sous le faix de la pauvreté: Les plus foibles au contraire soustenus de l'appuy des richesses, ne peuuent que tres-mal-aisément estre ébranlez. D'ailleurs, il faudroit ou que le Roy choisist luy-mesme ses officiers, ou que ce fut les Grands de son Royaume, ou le peuple: La premiere procedure aigriroit le mal, au lieu de l'appaiser, & multiplieroit les plaintes au lieu de les abreger. Chacun a bonne opinion de son merite: En quelque sorte d'office que

ce soit, ils se trouueroient pour le moins cent personnes pour chacun, qui s'estimeroient tous aussi bien le meriter que celuy qui en feroit recognu le plus capable: Tellement que ce seroit par ce moyen offencer tous les autres, & leur donner tous les iours subject de mescontentement & de plainte. Si le Roy conferoit ces offices sur le choix des Grands ou du peuple, ceste voye n'apporteroit que des partialitez & des seditions à la fin: Ce seroit remettre sus les Maires du Palais, & au lieu d'un seul en establir cinq cēts: Ce seroit auoir nō vn Roy mais seulement vn premier Presidēt au Royaume, qui n'auroit rien par-dessus ses Conseillers, que le nom & la preescance. Il se pratique toutesfois ainsi, direz-vous, en quelques Prouinces: Il est vray, mais tous Estats ne se doiuent pas regir de mesme. La voye de l'election est contraire au repos de nostre Estat: Les Papes mesmes l'ont recognu ainsi aux prelatures & dignitez Ecclesiastiques de France: C'est pourquoy ils l'ont prohibee en ceste premiere prouince de la Chrestienté, pour le bien des consciences, & le repos des François. Les lis surpassent (dit Plin) toutes les autres fleurs en hauteur; aussi font les Roys

de France tous les autres en autorité. Comme ils sont les premiers, ils doiuent seuls aussi estre vrayement Roys & vrayement grands. La grandeur absoluë des Roys de France ne se peut non-plus diminuer que la hauteur naturelle des lis s'abaisser; la pensee seule en est detestable & punissable, d'un extrême supplice.

Il y a de l'abus aux finances, il est vray, parce qu'il est en tous Estats: S'il faut establir vne Chambre ardante, il la faut establir non contre les financiers seuls, mais contre tous: Si nous y voulons penser, nous recognoistrans que le Payisan mesme fraude plus le Bourgeois son Maistre, que ne fait le financier son Prince. Il y a de l'abus aux finances, parce qu'il est trop vieil, c'est à dire de tout temps, ou pour le mieux dire, de trop long vsage: C'est renouueller vne trop vieille querelle. Le Roy Philippes le Long establir (pour y mettre ordre) la Chambre des Comptes à Paris: neantmoins elle n'a pas empesché les abus. Le feu Roy en fit dresser vne autre, qu'on appelloit la Chambre ardante: Mais comme ce grand Prince eust (par la viuacité de son esprit) recognu en vn instant les consequences de telles recherches, il ne l'eust

pas plustost fait ériger qu'il la fit supprimer , quoy qu'on luy en fit esperer vn grand nombre de millions d'or. Les Estats de la France ayant autrefois proposé cet expedient à Charles le Sage , pour recouurer argent, il le refusa. Quelques Empe-reurs Romains proposerent des recompenses aux denonciateurs , mais d'autres mieux conseillez leur ordonnerent l'infamie & le foüet.

Sommes-nous si aucuglez par nostre propre malheur , que nous ne nous puissions appercevoir que les fināces ne furent iamais mieux reglees , pour empescher l'abus qui s'y pourroit commettre , veu que rien ne s'y fait, rien ne s'y distribüë , qui ne passe par le Conseil, par le controlle, par le seau , & par la verification de la Chambre des Comptes? Que s'il y pouuoit auoir de l'abus, qu'il y seroit , parce qu'il y a esté & y sera tousiours: Car si tant de precautions ne pouuoient retenir le desordre , rien ne le pourroit iamais empescher.

Nous-nous plaignons du luxe du temps, est-ce pas se plaindre de trop de felicité? Est-ce pas veoir qu'aujourd'hui le Pay-san vit mieux que ne faisoit le Bourgeois aux siecles passez. Le Bourgeois mieux que le

Gentilhomme: Le Gentilhomme que le Prince, & le Prince que le Roy mesme? Nous regrettons ces siecles passez, qui estoient si pauvres, que le plus riche Prince ne pouvoit pas tant donner à ses enfans, que fait à present le riche Bourgeois d'une petite ville. Pourrions-nous supporter ces siecles du temps jadis, qui estoient si miserables, que le Bourgeois (comme il se voit par les ordonnances de Philippes le Bel) ne pouvoit non seulement porter or ny pierreries, mais mesme vn habit de riche teinture: ne pouvoit s'habiller que de drap à douze sols neuf deniers l'aune, & sa femme d'un à seize sols au plus; & auxquels il n'y auoit que les grandes Dames qui eussent plus d'une robe par an? Desirerions-nous vn siecle si sterile en toutes sortes de biens, qu'on ne pouvoit (ainsi parle ceste ordonnance du vieil temps) donner au grand manger plus de deux mets & vn potage au lard, sans fraude? On nous fait plaindre de l'imposition des tailles sur le pauvre peuple, & on ne nous donne pas à entendre que saint Louys en est le premier Auteur. Nous disons que les tailles sont trop grandes, qu'eussions nous dit en ces vieux temps, que nous regrettons

fous Louys le Jeune, qui print par an la
 vingtième partie du reuenu de son peu-
 ple? Sous Charles V. surnommé le Sage,
 qui print la douzième? Sous Philippes
 Auguste second du nom, qui print la dixiè-
 me? Sous le Roy Iean, qui print la dixiè-
 me & demie, mesme sur les Nobles & gens
 d'Eglise? Et sous Clotaire, qui leua la tier-
 ce partie des rentes & reuenus des Eglises?
 S'il ya du mal en ce que nous appellons
 luxe, c'est à dire en ce que nous estimons
 despence excessiue aux meubles, aux vi-
 ures & aux bastiments, ce mal ne regarde
 que quelques particuliers; il n'importe
 qu'aux aisez, qu'il peut mettre quelque-
 fois à mal-aise, pour accommoder tout le
 reste du peuple. Sont-ce pas ces deux pre-
 mières especes de despences qui enrichis-
 sent le Bourgeois, & le Marchand? Font
 viure à l'aise l'Artisan? Font mieux vendre
 les grains, les vins, & le bestail aux hommes
 des champs? échauffent par le lucre les
 hommes au trauail & aux inuentions?
 Font fleurir tous les arts, & meliorer la ter-
 re? Voyez s'il vous plaist la statuë à cheual
 en pierre, de Philippes le Bel, érigée dans
 l'Eglise Cathedrale de Paris; & celle en
 bronze du defunct Roy, posée sur le milieu

du Pont neuf, & vous recognoistrez bien tost l'inégalité de l'un des siècles à l'autre; la misere & pauvreté de celuy que vous regrettez, & la felicité & richesses de l'autre, que vous rejettez. Il n'y a pas aujourdhuy vn poulce de terre qui ne soit en labeur, il ne se trouue plus de terres vaines & vagues: Neantmoins il y a (pour estre la France trop peuplée) vne infinité d'hommes de peine, qui pour n'auoir peu apprendre mestier, ne peuuent gagner leur vie qu'au seruice des armes, ou des bastimens; qui par le defaut de l'une ou de l'autre de ces occupations, se font caymands, vagabonds, ou voleurs. Le premier employ est vn remede mille fois plus cruel que le mal mesme: Car la paix la plus inique, est mille fois plus à desirer que la plus iuste guerre du monde. On ne scauroit donc trop bastir, c'est l'auantage des pauvres gens. Iamais Prince (disent les mieux versez en l'histoire des temps) ne s'est rendu odieux pour ce subject: Il faut que ce qui a afflué iusques au Prince, reflue iusques à sa premiere source, de peur qu'elle ne tarisse. On se plaint des dons, neantmoins si on veut bien peser ceste plainte, on trouuera que le murmure seulement de la guerre a fait

plus de despence en trois mois, pour asseurer l'Estat, que les dons faicts pour le conserver n'en ont apporté en quatre années. Autrefois on s'est plaint de ce qu'on n'auoit plus d'argent en France, parce qu'il estoit tout (ce disoit-on) dans la Bastille; aujourd'hui on se plaint de ce qu'on l'en retire. Est-il pas remis plus vtilement dans les bourses fidelles des subiects, que dans des coffres forts? Vaut-il pas mieux souffrir que les seruiteurs du Roy le recoiuent, que d'estre cause que les Suisses & les Vualons l'emportent? Si la chaleur naturelle ne se respand iusques aux parties, les plus extrêmes du corps, & ne les foment, elles se corrompent en teignes & demangeaisons, qui amaigrissent tout le corps, & l'inquietent: De mesme, si les bien-faits du Prince ne descendent iusques à la partie la plus basse du peuple, elle se gaste par faineantises, larrecins & brigandages, dont par-apres tout le repos du reste de l'Estat est troublé.

Sommes-nous pas laschement ingrats, ou bien plustost desia du tout insensez par ce poison? Pouuons-nous pas comprendre que comme en vn estat de santé debile, les bons Medecins ne changent iamais la

coustume de viure, mesme quoy que mau-
 uaise? qu'ainsi en vn Estat tel que celuy
 d'apresent il est trop dangereux d'y rien
 innouer? Que s'il falloit changer quelque
 chose, qu'il faudroit attendre vne disposi-
 tion plus forte, & differer en vne autre sai-
 son? Pouuons-nous pas recognoistre dans
 l'histoire, qu'encore qu'aucune minorité
 ne se soit iamais passée sans guerres, qu'un
 tel Estat soit de soy-mesme calamiteux, &
 si veritablement tel, que Dieu mesme le
 nous a ainsi dit? Que l'Estat de la France
 soit le plus aisé à troubler, pour estre le
 François prompt & porté de son naturel
 aux changemens? Qu'entre toutes les mi-
 noritez qui ayent iamais esté en France,
 celle-cy fut la plus à redouter? Car le de-
 funct Roy, apres auoir éueillé toute la
 Chrestienté à la guerre, auoit abandonné
 cet Estat si soudain, qu'il n'auoit eu le loi-
 sir d'y mettre aucun ordre: Les Estrangers,
 ses ennemis, auoient les armes à la main:
 vne bonne partie des François s'ennuyant
 de la paix, estoit toute disposée à la broüil-
 lerie: l'autre estoit portée plustost à son in-
 terest particulier, qu'à la conseruation de
 l'Estat. Tous en general estoient telle-
 ment abbatus de la douleur de leur perte,

estonnez d'aprehension , & affoiblis de peur , que les moindres remuements les eussent mis en déroute : Neantmoins la forte prudence de la Roine a non seulement retenu ce grand Estat, qui pour sa legereté naturelle, se souleuoit de soy-mesme, & se laissoit emporter au premier vent: Mais elle l'a arresté ferme, contre les tourbillons les plus tempestueux. Elle a non seulement maintenu la France en la felicité en laquelle l'auoit laissée son grand Henry, mais elle l'a augmentee mesme ; si la diminution des subides , & la suppression de quelques quarante Edicts qui alloient à l'augmentation des finances du Roy , y ont peu apporter quelque accroissement. Bref, la seule & toute admirable sagesse a fait ce que la conduite de tous les siecles n'a peu faire depuis qu'il y a eu des Royaumes au monde. Quel naturel donc, quel ressentiment , de luy apporter des plaintes sans nombre, au lieu de luy rendre des actions de graces infinies ? Quelle estime pourront faire de nous les nations estrangeres, quand elles considererons ce-cy ? Qu'en pourront dire ceux qui viendront apres nous , quand ils le liront dans l'histoire ?

Vous avez veu comme du temps du regne de Henry III. on disoit premierement que toutes choses estoient en confusions ; & par-apres , que ce Prince mettoit tout en profusions : Qu'il prodiguoit le merite du trauail de ses subjects à des personnes sans merites : Qu'il tiroit les sueurs & les larmes de son peuple , exprimees iusques au sang , pour satisfaire à la soif insatiable de ses fauoris : Qu'on attraquoit en apparence les mignons , mais qu'on en vouloit en effect à la personne du Roy : Que ceste peste , pour auoir esté mesprisee perdit en fin le Roy , pour penser perdre avec luy tout le Royaume. On vous presente au-iourd'huy les mesmes leurres, & vous-y accourez. Vous voyez les mesmes piperies, & vous-vous en laissez dupper. Vous voyez qu'on vous veut mettre la haine dans l'ame, contre la Roine & les plus fidelles Ministres de l'Estat , pour vous faire prendre les armes en main, contre vous-mesmes. Il ne faut que changer les noms en ces meschans petits libelles infamants , qui cou-roient du temps du Roy Henry III. mettre seulement au lieu de ceux de quelques-vns des mieux affectionnez seruiteurs de ce Prince , celui de quelque seigneur

estraner, & vous verrez que ce sont ceux-là mesmes dont vous-vous laissez seduire. Vous y verrez les mesmes calomnies, les mesmes plaintes, les mesmes paroles. Vous-vous estes apperceuz sur le tard, & apres vos malheurs, que ceux que le Roy Henry III. auoit auancez, auoient esté tres-meschamment calomniez. Vous pouvez dès à present voir, si vous voulez, & auant vostre misere (il vous importe de le considerer) que ceux d'aujourd'huy ne le sont pas moins.

La calomnie nous dira, comme elle a fait soubs les regnes de Henry II, & Charles IX, que c'est mal fait de donner les gouuernemens & les principales charges du Royaume à vn estranger. Nous escoutons ces paroles, & nous ne recognoissons pas que ce sont blasphemés; puisque les loix punissent comme sacrileges ceux qui murmurent du choix que fait le Prince au subject de ses officiers. Les Romains, qui se sont acquis l'Empire du mōde, par leurs braues & sages deportemens, n'ont iamais donné le gouuernement des Prouinces à ceux du pais: ils recognoissoient cette faute de si grande consequence, que par leurs loix ils ont déclaré criminels de sacrilege ceux

qui demanderoient telles charges en leur pays : Ces premiers hommes d'Estat iugerent que les originaires peuuent estre souvent distraits de la consideration du bien public, par le regard de l'affection des parentez, des alliâces & amitez, ou inimitiez particulieres. Que ceux du pays preferent naturellement le bien de leurs compatriotes à celuy des estrangers ; & quelquefois par erreur celuy du Prince mesme ; & par ce moyen abusent de la Iustice qu'ils doiuent également à vn chacun : Au lieu que l'estranger, pour estre sans passion d'amitié ou de haine particuliere, pour n'auoir autre obligation qu'à Dieu, & au Prince qui l'enuoye, n'a occasion de se conduire que selon Dieu & le bien du seruice du maistre qui l'employe. Les ordonnances de France, dès le temps de Philippes le Bel & de Charles le Sage, sont conformes à ces sacrées constitutions : de sorte que nos Histories tesmoignent que ce Charles estant seulemēt regent, pendant la prison de Iehan son pere, cassa en presence des Estats conuoez lors à Paris, mesme plusieurs Conseillers & Maistres des Comptes, seulemēt pour estre du país, & nez dans le ressort. Par-apres ce Prince aduisé, estant venu à

la Couronne , fit Bertrand du Guesclin ;
 (tant signalé dans l'histoire, quoy que pau-
 ure Gentilhomme & estranger) non seule-
 ment Marechal de France , mais Con-
 nestable. Et d'autant que ce Gentilhom-
 me (pour auoir en ceste charge comman-
 dement iusques sur les Princes du sang)
 craignoit , à cause qu'il estoit extraict de
 pauvre noblesse les enuies , & de n'estre
 pas bien obey ; le Roy luy fit entendre &
 l'assura (dit l'histoire) qu'il n'auroit frere,
 neveu , cousin , ny autre qui ne luy rendit
 obeïssance ; & que celuy qui feroit autre-
 ment, s'apperceuroit de son courroux. Ce
 sage Prince aimoit si fort cest estranger,
 qu'il l'aima mesme apres son decés : De
 sorte qu'il luy fit faire sa sepulture aux
 pieds de la sienne , en l'Eglise saint Denis
 en France , laquelle s'y voit encores au-
 iourd'huy. Si la ville de Rome (l'estendue
 de deux ou trois lieues au plus) estoit autre-
 fois la patrie de tous les peuples ; de sorte
 qu'on disoit lors qu'il n'y auoit en tout l'v-
 niuers que les Barbares ou les Esclaues qui
 ne fussent pas Romains ; Pourquoi som-
 mes nous si lasches ? Pourquoi ne voulons-
 nous pas que la France, fauorable naturel-
 lement aux estrangers , ne se conserue cet

honneur que d'estre le pays commun à tous les gens de bien ; & faire tousiours recognoistre qu'il n'y a que les meschans qui y puissent estre estrangers ? Si tous les honnestes gens ont pour leur pays toutes les prouinces de la terre , par quelles raisons voulons-nous que la France n'y soit comprise ? Voyons-nous pas mesme que les plantes transplantées sont les plus fructueuses ? De tous les elemens il n'y a que ce peu de terre & de bouë que nous foulons aux pieds , que nous puissions recognoistre pour nostre lieu natal ; les autres nous sont communs avec le reste des hommes , & se changent en peu de temps : Car ce ne sont plus les mesmes eaves , le mesme air , ny la mesme constellation qui estoient lors de nostre naissance. N'enuions iamais la demeure des Estrangers en France , mais celle des François en tout autre pays que la France. C'est la marque de la felicité des prouinces, quand elles attirent les Estrangers : C'est le surcroist de la grandeur des Princes, qui ne sont grands que pour commander aux hommes : Car plus ils ont de subjects , plus ils ont de puissances , de forces & de richesses.

Les Republiques des Atheniens & La-

cedemoniens rigoureuses aux Estrangers ont esté de peu de duree: Au contraire, la France fauorable de tout temps à iceux, est l'Estat le plus ancien & le plus puissant de la Chrestienté, auxquels elle a non seulement par plusieurs fois & sous diuers Princes donné la charge de Marechal de France, mais celle mesme de Connestable. Que diroit-on si elle commettoit à present comme elle a fait autrefois & tousiours à son aduantage la conduite de ses armées aux Estrangers, à l'exemple des Venitiens & des Espagnols, peuples tenus pour les plus aduisez en fait d'Estat qui soient au-iourd'huy en la Chrestienté? On se plaint de ce qu'on donne la garde de quelque place esloignée à vn seigneur Estranger, sans considerer qu'en France on confie la garde la plus proche de la propre personne du Roy aux Escossois & aux Suisses. Quelque grand Politique a escrit qu'un Prince qui redoute les factions ciuiles, n'a meilleur moyen d'y remedier qu'en attirant en sa Cour vn nombre de Courtisans Estrangers, & en ayant quelques vns pour ses plus confidents. La France donc, qui ne peut estre defaicté que par elle mesme, & ne doit craindre sa ruine que par vne guer-

re intestine, a besoin pour se maintenir de
 fauoriser beaucoup les Estrangers: on com-
 pare le corps d'un Estat à vn corps animé.
 Tout ainsi que nos corps se reparent &
 s'entretiennent par la mesme chose dont
 ils ont esté premierement formez, (car
 comme ils sont engendrez du sang, aussi
 sont ils cōtinuellemēt nourris & restaurez
 par le sang) de mesme l'Estat des François
 fondé & estably premierement par les
 Estrangers a besoin continuellement
 d'Estrangers pour la conseruation.

Puisque nous voyōs donc que toutes ces
 plaintes sont telles qu'elles ont esté ou peu
 estre faictes de tout temps, pendant les sie-
 cles les plus desirez, aux regnes les plus
 heureux; & soubs les Princes les plus re-
 commandables, recognoissons que nous
 ne pouuons auoir assez de vehemence,
 d'indignation & d'horreur contre les Au-
 theurs de ces meschās petits libelles de se-
 dition; contre ceste peste & ce poison, qui
 seuls peuuent faire tuer les Roys, contre
 ceste rage qui échauffe les peuples à la fu-
 reur, & leur fait courir les champs en foule
 & corps d'armees, pour se defaire eux mes-
 mes. Huons ces hiboux & oyseaux fu-
 nestes, qui par leur cry malencontreux re-

ueillent & font tressaillir toute la France
 en son plus doux repos: Que tous les oy-
 seaux du iour facent tant à coups de bec &
 de cris, d'execrations & de maledictions,
 que ces chat-huās nocturnes se recachent
 d'effroy si auant dans les tenebres & dans
 la nuit du silence, qu'ils ne puissent iamais
 retrouver la lumiere ny le iour. Courons
 sus à ces boute-feux qui le portent dans le
 Louure, pour apres le faire voler en tous
 les endroits de la France. Demandons la
 vengeance de la mort de nos Roys sur la
 calomnie, puisque nous voyons que c'est
 vraiment elle qui les a meschamment
 assassinez. Crions & disons tout hault que
 Messieurs des Estats n'ont peu faire vne
 plus iuste demande en leurs cayers que
 celle de ceste punition: que l'article qui la
 contiendra demandera la reformation du
 plus grand & plus pernicieux abus qui soit
 en l'Estat. Representons-nous que les
 mesmes plaintes que l'on faiet aujourd'hui
 se pouuoient faire du temps du deffunct
 Roy; que le blasme qu'on veut donner au
 gouuernement present, va contre l'hon-
 neur de la memoire de ce grand Prince,
 que tous les peuples honorent: & pource
 remonstrons tres-humblement à sa Ma-

jesté qu'elle ne peut estre assez rigoureuse contre le crime qui comprend tous les autres en soy, qui tend à dissiper l'honneur des cendres glorieuses de son Pere, met au hazard l'Estat, en proye les biens, & au sang la vie, en fin en trouble toute la Chrestienté. On puniroit l'auteur d'un libelle infamant contre vn chetif crocheur: Ceux qui prestent l'aureille à la calomnie sont iugez autāt coupables que le calomniateur. Ceux qui se trouuent saisis d'un libelle fameux contre vn particulier, quel qu'il soit, sont punissables comme les auteurs mesmes: Neantmoins on tolere que ceux qui tendent à la sedition & seduction de tout le peuple, qui sont contre les sacrees personnes du Roy, de la Roine, & des plus fidelles Ministres de l'Estat, se vendent publiquement. Si nous recevons donc du mal, accusons-nous nous mesmes, comme vrayz auteurs & seuls coupables, par la tolerance de ce crime de nos propres malheurs.

Time Dominum, fili mi, & Regem: & cum detractoribus non commiscearis: Quoniam repente consurget perditio eorum. Prouerb. 24.

F I N.

